

體驗通渠工作 全身臭味

# 傳被飛出新劇 龔嘉欣有否認

■龔嘉欣第一份工作便做演員。



由15位藝人體驗不同工種的無綫綜藝節目《一日打工限定》昨日舉行記者會，黎諾懿、龔嘉欣、賴慰玲、吳偉豪與劉穎璇輪流分享打工經驗，當中以嘉欣的工種最令人驚訝，要做通渠師傅的厭惡性行業！對於有傳她被飛出新劇《璀璨之城》，嘉欣未有否認，只稱與該劇監製關係良好，相信將來會有合作機會。

**視**后龔嘉欣於無綫節目《一日打工限定》體驗通渠師的工作，她坦言沒有選擇做什麼工種：「因為我有試過打工，第一份工就係演員，所以抱住一不做二不休嘅心態，一做就做最激。節目組都問過我嘅尺度，我只係話到時再算，因為我對做通渠冇概念。」她感激兩位師傅拍檔，對她憐香惜玉：「我有問師傅呢行有冇女人，佢哋話之前有兩個，但以私人理由離職，唔係因為做厭惡性工作。」

嘉欣最難忘做完通渠後滿身臭味，坐工作人員的車輛時致滿車臭味。之前有傳嘉欣獲視后獎後會離巢，問到是否因此被安排做厭惡性工作？她笑言：「唔係，獎座前兩日先刻完名交到我

手，我覺得係一個新開始，反而想幫到更多人，所以今年會多做慈善工作。」有傳她被飛出新劇《璀璨之城》，她未有否認臨時易角，只表示與劇集監製關係良好，將來仍有很多合作機會。

## 賴慰玲學識剖魚

體驗做兩餸飯的諾懿與做魚販的賴慰玲，異口同聲表示不能接受通渠工作，賴慰玲說：「如果要我做，我一定會推，因為我怕臭。」諾懿亦說：「我都好怕污糟，有少少污糟已經可以令我全日唔開心。」賴慰玲表示本身不會入廚房，今次做魚販學識剖魚，並懂得挑選最好的象拔蚌。

諾懿表示：「唔好以為做兩餸飯好簡單，做廚師要一個人識得煮幾十道菜式。」問到有否興趣開兩餸飯店？他說：「唔會，因為太辛苦，萬一廚師走咗搞唔掂。」提到他與李佳芯合演馬來西亞劇集，他說：「仲未落實，如果真係拍，預計要拍兩個月。」



■左起：吳偉豪、劉穎璇、賴慰玲、龔嘉欣與黎諾懿分享拍攝趣事。



■賴慰玲怕臭，拒做通渠工作。

## 陳奕迅確診新冠肺炎 高雄演唱會延期

陳奕迅(Eason)原定今日在台灣高雄巨蛋開演唱會，前晚突感身體不適，昨日早上經醫生診斷確診為新冠肺炎，須立即停止所有演出活動並進行休養，演唱會被迫延期。面對突如其來的病毒侵襲，確定首周無法如期到高雄，Eason 非常難過及深感歉意。

演唱會團隊已緊急協調後續安排，原定5月16、17、18日於高雄巨蛋舉行的3場演出將延期舉行。已購票觀眾可持原票於新場次原座位入場，欲選擇退票的觀眾，請依照拓元售票系統公告之退票方式辦理，主辦單位將全額退款。

■陳奕迅專心養病，務求盡快康復。  
資料圖片



## 《中年》師弟妹陸續有來 周吉佩怕分薄資源

38歲周吉佩將於7月書展推出自傳《第三人生》，昨日為新書拍封面照，並帶來亡父的相機一起拍照。提到《中年好声音3》剛結束，第4季已開始啟動報名，身為首屆冠軍的他被問可擔心師弟妹分薄公司資源？他坦言：「《中年》有太多學員，唔怕就假，怕就一定會有，但都唔怕得咁多，會繼續做好自己嘅歌同準備出書，同理拍網上節目。《中年》有好多好有實力嘅人，希望將來有機會合作。張與辰同我傾過，佢想嚟馬來西亞開騷，有問我一齊去好唔好，我當然想，如果能夠去馬來西亞真係託佢鴻福。（新書係自己投資？）我同團隊一齊做，公司都有參與。」

吉吉說：「有人覺得我年紀尚輕就出自傳，似乎太早，但我覺得人生有唔少值得分享嘅經歷，希望以自身經歷鼓勵同路人。」問到可會騷肌拍照？他笑言：「新書唔適合騷肌，或者留到出寫真集先騷，但暫時冇考慮影寫真。」



■吉吉做好自己，不擔心被師弟妹頭。